

Teitl y cyfarfod: **Cyfarfod y Bwrdd (Busnes)**

Canolfan Cae Cymro, Clawddnewydd

**Dyddiad y
cyfarfod:** 9 Gorffennaf 2015

Aelodau'r Bwrdd: Ruth Hall
Madeleine Havard
Harry Legge-Bourke
Peter Matthews (Cadeirydd)
Andy Middleton
Nigel Reader
Emyr Roberts (Prif Weithredwr)
Lynda Warren
Paul Williams

**Aelodau'r Tîm
Gweithredol a
oedd yn
bresennol:** Clive Thomas, Cyfarwyddwr Llywodraethu
Kevin Ingram, Cyfarwyddwr Gweithredol Cyllid a Gwasanaethau
Corfforaethol
Gareth O'Shea, Cyfarwyddwr Gweithredol, Gweithrediadau'r De
Tim Jones, Cyfarwyddwr Gweithredol, Gweithrediadau'r Gogledd a'r
Canolbarth
Ceri Davies, Cyfarwyddwr Gweithredol Gwybodaeth, Strategaeth a
Chynllunio
Trefor Owen, Cyfarwyddwr Gweithredol Gwasanaethau
Cenedlaethol
Catherine Smith, Cyfarwyddwr Cysylltiadau Allanol a Chyfathrebu

Ysgrifenyddiaeth: Kelly Goswell
Geri Mills

Croeso

1. Croesawodd y Cadeirydd bawb i'r cyfarfod.
2. Nododd y Cadeirydd y byddai'r agenda'n cael ei haildrefnu er mwyn galluogi aelodau'r Bwrdd i drafod y papur ar 'Opsiynau Rheoli i Fynd i'r Afael â'r Gostyngiad Mewn Stociau Eogiaid a Siwin yng Nghymru' gyda rhai o'r bobl a oedd yn bresennol, yn ystod amser coffi.
3. Cyfeiriodd y Cadeirydd at farwolaeth drist Moc Morgan, gan gydnabod y cyfraniad yr oedd wedi'i wneud i bysgodfeydd yng Nghymru ar hyd ei oes.

Ymddiheuriadau

4. Cafwyd ymddiheuriadau gan Hywel Davies, Aelod o'r Bwrdd; Ashleigh Dunn, Cyfarwyddwr Gweithredol Datblygu Sefydliadol a Rheoli Pobl; Niall Reynolds, Cyfarwyddwr Pontio; a Martin Britton, Prif Swyddog Gwybodaeth.

Datgan buddiannau

5. Cafodd y datganiadau canlynol eu nodi:
 - Nododd Harry Legge-Bourke ei fod yn Gadeirydd Cymdeithas Pysgodfeydd Brynbuga
 - Nododd Paul Williams ei fod yn aelod o amryw syndicetiau pysgota
 - Nododd Lynda Warren ei bod yn arfer bod yn un o ymddiriedolwyr yr Ymddiriedolaeth Natur, mewn perthynas â'r papur briffio ar yr Afanc Ewropeaidd.

Cadarnhau'r Cofnodion

6. Cytunwyd bod cofnodion cyfarfod y Bwrdd a gynhaliwyd ar 7 Mai yn gofnod cywir o'r cyfarfod, a chawsant eu cymeradwyo gan y Bwrdd.

Adolygu'r llog camau gweithredu

7. Adolygwyd y camau gweithredu a chafwyd y sylwadau canlynol:

- Cam gweithredu 1: Y Cyfarwyddwr Gweithredol Gwybodaeth, Strategaeth a Chynllunio i ddarparu papur briffio o gyfarfod y sector busnes coedwigaeth ar gyfer cyfarfod mis Gorffennaf y Bwrdd – Cyflawnwyd – cafodd y papur ei ddosbarthu gyda phapurau'r Bwrdd.
- Cam gweithredu 2: Y Cyfarwyddwr Gweithredol Datblygu Sefydliadol a Rheoli Pobl i adolygu'r meincnod absenoldeb salwch ac adolygu geiriad y targed – Cyflawnwyd - cafodd y geiriad ei adolygu.
- Cam gweithredu 3: Y Cyfarwyddwr Gweithredol Gwybodaeth, Strategaeth a Chynllunio i ddatblygu papur opsiynau ac i ddarparu diweddariadau pellach i gyfarfodydd Bwrdd yn y dyfodol ar y gwaith o ddatblygu Cynllun Gweithredu – Cyflawnwyd - mae'n eitem ar yr agenda.
- Cam gweithredu 4: Y Cyfarwyddwr Gweithredol Gwybodaeth, Strategaeth a Chynllunio i bennu meini prawf ariannu Rheoli Adnoddau Naturiol ar eu gwedd derfynol, gyda chymorth y Grŵp Bwrdd Cymunedau – Cyflawnwyd - cafodd y wybodaeth ei dosbarthu gyda phapurau'r Bwrdd.
- Cam gweithredu 5: Y Cyfarwyddwr Llywodraethu i ddarparu adroddiad ar weithgarwch cyfreithiol i gyfarfod o'r Bwrdd yn y dyfodol – Cyflawnwyd - nodwyd y cais ar Ragolwg y Bwrdd.
- Cam gweithredu 6: Dyddiad i'w drefnu ar gyfer sesiwn ar Fil yr Amgylchedd – Cyflawnwyd - cyflwynwyd sylwadau drwy ebost ac maent bellach wedi'u cyflwyno.

Y wybodaeth ddiweddaraf am les, iechyd a diogelwch NRW B B 38.15

8. Cyflwynodd y Prif Weithredwr y papur i'r Bwrdd gan roi manylion yr ystadegau o 1 Ebrill 2015 i 12 Mehefin 2015.
9. Nodwyd bod absenoldeb oherwydd salwch yn dal yn bryder, gan nad oedd yr holl ddata ar gyfer 2015/2016 ar gael oherwydd bod system MyNRW yn dal i gael ei chyflunio. Mae'r mater hwn bellach yn cael ei reoli'n weithredol gan Fwrdd Prosiect MyNRW.
10. Darparwyd adroddiad diweddar yn y papur yn ymwneud â'r digwyddiad a fu yng Nghoed y Brenin. Mae'r contractwr bellach yn gwella o'i anafiadau ac mae'r gwaith ar y safle wedi ailddechrau ar ôl diwygio'r datganiad ynghylch y dull gweithredu a'r asesiad risg.

11. Mae'r Tîm Rheoli Cyfleusterau bellach yn adolygu'r ddarpariaeth o ran cymorth cyntaf mewn swyddfeydd a depos er mwyn sicrhau bod digon o bobl â chymwysterau cymorth cyntaf ar gael.
12. Bu'r Cyfarwyddwyr Gweithredol yn briffio'r Bwrdd o'u safbwynt nhw, a gyda'i gilydd bu iddynt gadarnhau bod lles, iechyd a diogelwch yn flaenoriaeth uchel ac mae cynnydd yn dal i gael ei wneud o ran gweithredu ac ymgorffori systemau newydd.
13. Trafododd y Bwrdd y dadansoddiad ystadegol a'r modd y gellir defnyddio tueddiadau i dargedu camau gweithredu ataliol. Mae hynny'n arbennig o bwysig mewn perthynas â lles staff.
14. Nododd y Bwrdd bod Cyfoeth Naturiol Cymru yn aelod corfforaethol o Gynllun Actif Cyngor Dinas Caerdydd (sy'n darparu mynediad am bris is i staff i holl gyfleusterau hamdden y Cyngor) ac awgrymwyd y dylid ymestyn y cynnig hwn i staff eraill Cyfoeth Naturiol Cymru ar draws Cymru.
15. Codwyd y mater ynghylch signal ffonau symudol a'r trefniadau i'r sawl sy'n gweithio ar eu pen eu hunain, a hysbysodd y Cyfarwyddwyr Gweithrediadau y Bwrdd ynghylch y trefniadau sydd ar waith ar hyn o bryd.

Adroddiad Cyllid – Diwedd blwyddyn 2014/15 NRW B B 39.15

16. Cyflwynodd y Cyfarwyddwr Gweithredol Cyllid a Gwasanaethau Corfforaethol y papur i'r Bwrdd, gan nodi'r wybodaeth ddiweddaraf am y sefyllfa ariannol ar 31 Mawrth 2015, yr amserlenni ar gyfer cwblhau'r Adroddiad Blyneddol a'r Cyfrifon ar gyfer 2014-15, a'r cynnydd a wnaed mewn perthynas â nifer o faterion cyfredol eraill yn ymwneud â chyllid.
17. Cymeradwyodd Cadeirydd y Pwyllgor Archwilio a Sicrhau Risg drylwyredd a chywirdeb y gwaith a wneir yng nghyswllt rheolaeth ariannol ac adrodd ynghylch materion ariannol.
18. Trafododd y Bwrdd y papur gan nodi y byddai'r rhaglen a lansiwyd yn ddiweddar, 'Llwyddo gyda Llai', yn dylanwadu ar adroddiadau ariannol y dyfodol. Nod y rhaglen yw ysgogi newid diwylliannol, er mwyn helpu i sicrhau'r arbedion effeithlonrwydd a fwriedir gydag astudiaethau achos ategol.

CAM GWEITHREDU: Cysylltu â busnesau blaengar sydd â diddordeb mewn gwarchod yr amgylchedd, er mwyn rhannu arfer da ar bynciau megis caffael â Cyfoeth Naturiol Cymru

Cynigion yr Ymgynghoriad ar Godi Tâl – 2016/17 a 2017/18 NRW B B 42.15

19. Cyflwynodd y Cyfarwyddwr Gweithredol Cyllid a Gwasanaethau Corfforaethol y papur i'r Bwrdd gan nodi ers lansio Cynllun Codi Tâl cyntaf Cyfoeth Naturiol Cymru ar 1 Ebrill 2015 ar gyfer blwyddyn ariannol 2015/16, ei bod yn ofynnol adolygu'r cynlluniau hyn o bryd i'w gilydd ac ymgynghori ynghylch unrhyw newidiadau a gynigir.
20. Trafododd y Bwrdd y cynigion a nodwyd y pwyntiau canlynol:
- Cytunodd y Bwrdd y byddai gan yr Is-grŵp Codi Tâl gyfrifoldeb dirprwyedig dros lunio'r cynigion terfynol ar y cyd â'r Tîm Gweithredol.
 - Bydd rhannu gwybodaeth â sefydliadau eraill cyfatebol yn helpu i sicrhau bod y cynigion terfynol mor gadarn ag sy'n bosibl.
 - Nododd y Bwrdd bod angen trafodaethau mwy hirdymor â'r ymgynghoreion, ac y bydd yn bwysig cael cynllun cyfathrebu sy'n esbonio ein penderfyniadau.
 - Nodwyd, yn achos rhai taliadau, y byddai cael hyblygrwydd tebyg i'r hyn sydd ar gael ar gyfer cynlluniau ynni dŵr bach yn bwysig i ficro-fusnesau.
21. Cytunodd y Bwrdd bod y dull gweithredu'n briodol, a chymeradwyodd y cynigion a'r dirprwyo.

CAM GWEITHREDU: Y Cyfarwyddwr Gweithredol Cyllid a Gwasanaethau Corfforaethol a'r Cyfarwyddwr Gweithredol Gwybodaeth, Strategaeth a Chynllunio i weithio gyda'r Is-grŵp Codi Tâl i lunio'r cynigion terfynol

Sicrhau Bioamrywiaeth drwy Reoli Adnoddau Naturiol NRW B B 43.15

22. Croesawyd Hazel Drewett i'r cyfarfod gan y Cyfarwyddwr Gweithredol Gwybodaeth, Strategaeth a Chynllunio a chyflwynodd y papur i'r Bwrdd gan ofyn i'r Bwrdd nodi ein rôl o safbwynt sicrhau bioamrywiaeth a nodi'r modd y bydd hynny'n cael ei gyflawni yng nghyd-destun rheoli adnoddau naturiol yn gynaliadwy.
23. Trafododd y Bwrdd y papur a rhoddodd yr adborth canlynol:
- Mae'r Bwrdd yn cefnogi parhau i weithio ar ffurf 'Tîm Cymru' i wella canlyniadau o ran bioamrywiaeth.
 - Trwy weithredu Bil yr Amgylchedd, mae angen i Cyfoeth Naturiol Cymru ddangos cysylltiadau â'r gwaith o sicrhau gwell canlyniadau o ran bioamrywiaeth.
 - Nodwyd y byddai'r ymgynghoriad â Llywodraeth Cymru ynghylch y Cynllun Adfer Natur yn cael ei gwblhau erbyn yr hydref, a bydd y cynllun hwnnw'n adnabod blaenoriaethau ac yn amlinellu rolau a chyfrifoldebau.

- Mae angen gwneud mwy o waith er mwyn sicrhau bod gwarchod natur yn cael ei adlewyrchu yn ein negeseuon cyfathrebu, gan ofalu bod gwaith cyfathrebu allanol yn glir a bod iddo gystrawen a neges gyson.
 - Tynnwyd sylw at y ffaith bod angen adlewyrchu ein rôl o safbwynt gwarchod a gwella bioamrywiaeth forol.
 - Cyngorwyd y dylid defnyddio'r adroddiad ar Sefyllfa Adnoddau Naturiol i ddarparu'r sylfaen dystiolaeth a fydd yn sail i flaenoriaethau.
 - Teimlwyd ei bod yn annhebygol y byddai'r targedau o ran bioamrywiaeth a bennwyd ar draws Ewrop, y DU a Chymru yn cael eu cyrraedd erbyn 2020.
 - Nodwyd bod ymgysylltu â phartneriaid a rhanddeiliaid allweddol yn hollbwysig er mwyn gallu cyflawni. Cymeradwywyd yr ymateb diweddar i Wythnos Bioamrywiaeth Cymru.
24. Cytunodd y Bwrdd bod gwella canlyniadau o ran bioamrywiaeth yn allweddol i'n dyheadau i reoli adnoddau naturiol, ond bod angen i Lywodraeth Cymru ystyried y dylanwadau ehangach sy'n cael effaith andwyol ar fioamrywiaeth wrth osod targedau.

Y Gyfarwydddeb Fframwaith Dŵr a'r Cynlluniau Rheoli Basn Afon – Y Camau Nesaf NRW B B 44.15

25. Croesawyd Rhian Thomas i'r cyfarfod gan y Cyfarwyddwr Gweithredol Gwybodaeth, Strategaeth a Chynllunio a chyflwynodd y papur i'r Bwrdd gan grynhoi'r ymatebion a gafwyd i'r ymgynghoriad i fersiynau drafft Cynlluniau Rheoli Basn Afon y Gyfarwydddeb Fframwaith Dŵr ynghyd â'r camau nesaf a gynigir ar gyfer datblygu'r cynlluniau terfynol.
26. Trafododd y Bwrdd y papur a rhoddodd yr adborth canlynol:
- Bydd gweithredu'r Strategaeth Ddŵr yn helpu i gynorthwyo Cyfoeth Naturiol Cymru i gyflawni canlyniadau eraill, gan gynnwys y canlyniadau'n ymwneud â bioamrywiaeth.
 - Mae angen gwneud rhagor o waith gyda Llywodraeth Cymru i archwilio opsiynau ariannu ehangach.
 - Nodwyd bod grŵp gorchwyl a gorffen wedi'i sefydlu i ystyried y gofynion parhaus o ran gweithredu a rhannu gwybodaeth am y gofynion hynny.
 - Cytunodd y Bwrdd y dylai llwyddiant y gweithdai dalgylch a'r ymateb cadarnhaol iddynt fod yn sail i waith ymgysylltu â rhanddeiliaid a grwpiau allweddol yn y dyfodol.
 - Cytunodd y Bwrdd bod y targedau'n uchelgeisiol ond yn realistig ac yn briodol hefyd.
 - Gofynnwyd am sicrwydd y byddai'r costau i weithredu 'ar lawr gwlad' yn cael eu hamlinellu maes o law.
27. Cymeradwyodd y Bwrdd y papur gan dderbyn yr heriau anodd a oedd i ddod a chymeradwyo rôl Rheolau Rhwymo Cyffredinol fel adnodd pwysig i gefnogi gwaith cyflawni.

Cynllun Iaith Gymraeg – Adroddiad Blynyddol i Gomisiynydd y Gymraeg 2014-15 NRW B B 45.15

28. Cyflwynodd y Prif Weithredwr yr Adroddiad Blynyddol ar y Cynllun Iaith Gymraeg a gafodd ei baratoi ar gyfer Comisiynydd y Gymraeg. Mae'r adroddiad yn amlinellu'r cynnydd a wnaed gan Cyfoeth Naturiol Cymru yn ystod y flwyddyn ddiwethaf.
29. Mae rhai o'r uchafbwyntiau'n cynnwys ehangu'r ddarpariaeth o ran hyfforddiant, datblygu llawlyfr Cymraeg a'r bwriad i gyflwyno meddalwedd erbyn mis Mawrth 2016 er mwyn sicrhau bod modd gweithio'n ddwyieithog.
30. Croesawodd y Bwrdd yr adroddiad gan gymeradwyo brwdfrydedd ac ymdrechion y staff i ddysgu Cymraeg yn y sefydliad.

Yr Afanc Ewropeaidd yng Nghymru NRW B B 41.15

31. Cyflwynodd Cyfarwyddwr Gweithredol, Gweithrediadau'r Gogledd a'r Canolbarth ddatganiad safbwynt drafft Cyfoeth Naturiol Cymru mewn perthynas ag ailgyflwyno'r afanc Ewropeaidd i Gymru.
32. Cafodd y datganiad ei gytuno gan y Bwrdd, yn amodol ar wneud rhai newidiadau a gafodd eu croesawu gan Gyfarwyddwr Gweithredol, Gweithrediadau'r Gogledd a'r Canolbarth.

Opsiynau Rheoli i Fynd i'r Afael â'r Gostyngiad mewn Stociau Eogiaid a Siwin yng Nghymru NRW B B 40.15

33. Croesawodd y Cyfarwyddwr Gweithredol Gwybodaeth, Strategaeth a Chynllunio Peter Gough i'r cyfarfod. Cyflwynodd Peter Gough wybodaeth i'r Bwrdd ynghylch statws stociau a'r camau nesaf y bwriedir eu cymryd, gan gynnwys y bwriad i ymgysylltu â rhanddeiliaid.
34. Agorodd y Cadeirydd y drafodaeth drwy egluro bod Cyfoeth Naturiol Cymru a'r holl rhanddeiliaid yn rhannu'r un pryderon ynghylch lefelau presennol y stociau, a'u bod wedi ymrwymo i ddod o hyd i atebion er mwyn cael pysgodfeydd sy'n ffynnu ar draws Cymru.
35. Trafododd y Bwrdd y mater a rhoddodd yr adborth canlynol:
- Roedd pawb yn cytuno bod y sefyllfa'n ddifrifol ac y gallai'r effeithiau economaidd-gymdeithasol fod yn sylweddol, a bod angen ymateb o ddifrif i'r sefyllfa felly.

- O ran dal a rhyddhau, cafwyd eglurhad bod hynny hefyd yn cynnwys defnyddio rhwydi.
- Cytunwyd ar y cysylltiadau rhwng y mater hwn a'r papurau cynharach ar y Strategaeth Ddŵr, y Gyfarwyddeb Fframwaith Dŵr a Sicrhau Canlyniadau Bioamrywiaeth drwy Reoli Adnoddau Naturiol, a pherthnasedd y rheiny i'r mater hwn, a chytunwyd hefyd y dylid datblygu dulliau gweithio integredig yn Cyfoeth Naturiol Cymru.
- Cytunwyd â'r ymrwymiad i sicrhau gwell dealltwriaeth ynghylch y mater hwn, a oedd yn cynnwys ymgysylltu mwy â chyrff megis y Gymdeithas Eogiaid a Brithyllod, y Sefydliad Rheoli Pysgodfeydd a'r Sefydliad Siartredig Rheoli Dŵr a'r Amgylchedd
- Nodwyd bod cynlluniau rheoli dŵr ar gyfer gweithrediadau eisoes wedi'u cynhyrchu ar gyfer coetiroedd a reolir gan Cyfoeth Naturiol Cymru a hefyd gan y diwydiant coedwigoedd ehangach.
- Trafododd y Bwrdd sut y gallai Rheolau Rhwymo Cyffredinol ategu'r gwaith o gyflawni'r amcanion hyn, a chymeradwywyd gwneud mwy o waith ar y dull gweithredu hwn.
- Cytunodd y Bwrdd y dylid trafod yr opsiynau a amlinellir yn y papur â'r rhanddeiliaid yn y grwpiau dalgylch cyn i'r Bwrdd wneud unrhyw benderfyniadau terfynol.

CAM GWEITHREDU: Yr Ysgrifenyddiaeth i nodi ar Ragolwg y Bwrdd y bydd angen cael y wybodaeth ddiweddaraf am y mater yn y dyfodol

36. Diolchodd y Bwrdd i Peter Gough am y cyflwyniad clir a defnyddiol a oedd yn atgyfnerthu ymrwymiad Cyfoeth Naturiol Cymru i weithredu er mwyn gwireddu ein dyhead i ddod o hyd i ateb tymor hir. Cafwyd cefnogaeth lwyr i'r cynigion mewn egwyddor, a phwysleisiodd y Bwrdd bwysigrwydd yr ymgynghoriad arfaethedig â grwpiau dalgylch.

Y wybodaeth ddiweddaraf gan y Cadeirydd (ar lafar)

37. Rhoddodd y Cadeirydd y wybodaeth ddiweddaraf am gyfarfodydd a fynychwyd, a chyflwynodd adroddiad am weithgareddau a gynhaliwyd dan bedair colofn Rheoli Adnoddau Naturiol:

Yr amgylchedd

- Cynhadledd ar ddŵr
- Y Cydbwyllgor Gwarchod Natur

Yr economi

- Undeb Cenedlaethol yr Amaethwyr
- Yr economi werdd

Gwybodaeth

- Gwyddoniaeth y bobl
- Mynychwyd seremoni wobrwyo CIEEM a gynhaliwyd dros ginio ar ran y Cadeirydd gan Lynda Warren – enillodd Cyfoeth Naturiol Cymru wobwr ‘arfer gorau’ am waith cadwraeth ar raddfa fach, am greu’r cynefin gwlyptir yn hen waith brics y Friog.

Y wybodaeth ddiweddaraf gan y Prif Weithredwr (ar lafar)

38. Rhoddodd y Prif Weithredwr y wybodaeth ddiweddaraf i’r Bwrdd ar lafar, a oedd yn cynnwys y canlynol:

- Adborth cadarnhaol ynghylch nifer o gyfarfodydd gyda byrddau iechyd i drafod y prospectws iechyd
- Bod yn bresennol yn agoriad swyddogol fferm wynt Gwynt y Môr
- Mynychu nifer o gyfarfodydd gydag uwch-gynrychiolwyr o brifysgolion Cymru i archwilio diddordebau cyffredin a chyfleoedd i gydweithio
- Bod yn bresennol yn nathliad 25 mlynedd Plantlife

39. Rhoddodd y Prif Weithredwr y wybodaeth ddiweddaraf am y camau a gymerwyd i fynd i’r afael â chanlyniadau’r arolwg staff a gynhaliwyd yn ddiweddar. Mae Cynllun Gweithredu wedi’i ddatblygu, ac yn ddiweddar cafodd ei rannu â phob aelod o staff. Mae camau gweithredu allweddol wedi’u nodi er mwyn mynd i’r afael â’r prif heriau, ac mae’r Tîm Gweithredol wedi ceisio ymgysylltu â staff er mwyn deall y pryderon sy’n dod i’r amlwg yn yr arolwg. Un o’r prif negeseuon yn y Cynllun Gweithredu yw y dylid parhau i wneud y gwaith gwrando ac ymgysylltu hwn.

Adroddiadau gan Bwyllgorau

Y Pwyllgor Cydnabyddiaeth Ariannol

40. Cyfarfu’r Pwyllgor ar 11 Mehefin, a chafodd y cofnodion eu rhannu ag aelodau’r Bwrdd er gwybodaeth ac er mwyn eu cadarnhau. Roedd y pynciau a drafodwyd yn cynnwys y Cynllun Ymadael Gwirfoddol Unigol, gwerthuso swyddi a gwaith trawsnewid.

Y Pwyllgor Archwilio a Sicrhau Risg

41. Cyfarfu’r Pwyllgor ar 11 Mehefin a chafodd cofnodion y cyfarfod eu rhannu ag aelodau’r Bwrdd er gwybodaeth ac er mwyn eu cadarnhau. Cafodd adroddiad blynyddol y Pwyllgor ei rannu hefyd.

42. Bydd y Pwyllgor Archwilio a Sicrhau Risg yn cyfarfod eto ar 17 Gorffennaf er mwyn ystyried yr adroddiad blynyddol a’r cyfrifon ar gyfer 2014/15.

Pwyllgor Rheoli Perygl Llifogydd Cymru

43. Mae Madeleine Havard bellach wedi'i phenodi'n Gadeirydd dros dro Pwyllgor Rheoli Perygl Llifogydd Cymru nes bod y Pwyllgor newydd yn cael ei sefydlu dan Fil yr Amgylchedd.
44. Cynhelir y cyfarfod nesaf ar 16 Gorffennaf.

Y Pwyllgor Safleoedd Gwarchodedig

45. Nododd y Pwyllgor nad oedd unrhyw gyfarfodydd ffurfiol wedi'u cynnal, ond mae'r Pwyllgor yn parhau i roi cyngor ynghylch nifer o faterion yn ymwneud ag ardaloedd gwarchodedig.

Y wybodaeth ddiweddaraf gan Grwpiau'r Bwrdd (ysgrifenedig)

46. Darparwyd adroddiadau gan Grwpiau'r Bwrdd er gwybodaeth.

Rhagolwg

47. Nododd y Cadeirydd bod y Gweinidog wedi gofyn iddo aros yn y swydd ar ôl y dyddiad gorffen a bennwyd gan ei fod wedi penderfynu ailhysbysebu swydd y Cadeirydd.
48. Nododd y Cadeirydd bod angen adolygu dyddiad cyfarfod nesaf y Bwrdd.

CAM GWEITHREDU: Yr Ysgrifenyddiaeth i drefnu dyddiad newydd ar gyfer cyfarfod mis Medi

Unrhyw fater arall

49. Nodwyd bod disgwyl i adroddiad y Swyddfa Cyflawni Rheoleiddio Gwell gael ei gyhoeddi ar wefan Llywodraeth Cymru – caiff y manylion eu rhannu â'r Bwrdd. Diolchwyd am yr adroddiad hwn, sy'n garreg milltir enfawr i Cyfoeth Naturiol Cymru.
50. Daeth y Cadeirydd â'r cyfarfod i ben.